

<><><><><><>

JK Cabinet Meet

जम्मू-कश्मीर च मुख्यमंत्री ओमर अब्दुल्ला हुंदी अगुवाई आहली सरकार दे मंत्रिमंडल दी ब'रे 2025 दी पैहली बैठक अज्ज जम्मू आहले सिविल सैक्रेटेरिएट च लोआई जाहग। मुख्यमंत्री ओमर अब्दुल्ला होर इस बैठक दी प्रधानता करडन ते इस मौके पर खजाना, सेहत ते शिक्षा विभागें कन्नै जुड़े दे महत्वपूर्ण मामलें पर सोच-विचार कीता जाहग। बैठक दे एजेण्डे आहले मुख्य मामलें च सरकारी मुलाजमें ते पेंशनरें लेई मैंहगाई भत्ते दी नजरसानी, दंदें दे अस्पतालें च त्रै-स्तरें पर शैक्षणिक अमले आहले ढांचे दी अमल-आवरी ते झेहलम ते बाणगंगा नदिएं दे रक्ख-रखाऽ सरबंधी परियोजनां शामिल न। एहदे अलावा जीएसटी कानून च संशोधन, आबकारी नीति 2025 ते भर्ती प्रक्रिया गी चुस्त-दुरुस्त बनाने दे कन्नो-कन्नी प्रशासन ते लोकें दे कल्याण आहले मामलें पर बी इस मौके चर्चा कीती जाहग।

<><><><><><>

Death Toll Centre Team

राजौरी जिले दे बड्डाल ग्रांऽ च रहस्यमयी बमारी करी मरने आलें दी गिनतरी बधियै 17 होई गई ऐ। कल 17मीं मौत, 15एं ब'रें दी यासमीन नांऽ दी कुड़ी दी होई जेहड़ी एसएमजीएस अस्पताल जम्मू च भर्ती ही। देशै दे बक्ख-बक्ख संस्थानें च कीते गेदे नमूनें दी जांच दे बाद वायरस जां इनफैक्शन दी शैका थमां इंकार कीता गेआ ऐ। तोआई लेफ्टिनेंट गवर्नर मनोज सिन्हा होरें जानकारी दित्ती ऐ जे बक्ख-बक्ख मंत्रालयें थमां उच्च स्तरै दी माहिरें दी टीम बड्डाल ग्रांऽ च होई दी मौतें दी वजह दा पता लाने लेई उत्थें पुज्जी गेदी ऐ। इस टीम च सेहत, राई-बाई, जल संसाधन ते फोरेंसिक दे माहिर शामिल न। श्री सिन्हा होरें भरोसा दोआंदे होई आखेआ जे जम्मू कश्मीर पुलस दी विशेष जांच टीम ते केन्द्री टीम, अपने सांझे जतनें कन्नै इस इस गल्ल दा पता ला'रदिआं न जे बड्डाल च होई दिएं मौतें दे पिच्छे आखर केहड़ी वजहां न ते इस करी बने दे हालात गी किस चाल्ली सांभेआ जाई सकदा ऐ।

<><><><><><>

J&K Spring

राजौरी जिला प्रशासन नै बड्डाल ग्रांऽ दी इक बौहली दे पानी दे नमूनें च कीड़ेमार दवाईएं दी मजूदगी साबत होने दे बाद उसी फौरी तौरा पर सील करी दित्ता ऐ। जिला प्रशासन ने पुलस गी सख्त हिदायत दिंदे होई आखेआ ऐ जे इस बौहली दे कोल 24 घंटे सुरक्षाकर्मिं दी तैनाती कीती जा तांजे एहदे पानी दे इस्तेमाल पर पूरी चाल्ली रोक लग्गी सकै।

<><><><><><>

Sopore Encounter

कश्मीर घाटी दे सोपोर इलाके च कल सुरक्षाबलें ते आतंकवादिएं बश्कार टाकरा भखी गेआ। एह टाकरा उसलै शुरू होआ जिसलै सोपोर दे गुज्जरपाटी इलाके च चलाए गेदे इक तपाशी अभियान दरान आतंकवादिएं सुरक्षाबलें दे जवानें पर फायर खोली दित्ता। इलाके च

आतंकवादिएं दे मजूद होने दे बारे च थोई दी इक पक्की सूह दी बिनाह उप्पर कारवाई करदे होई भारती फौज ते जम्मू कश्मीर पुलस आस्सेआ सांझे तौरा पर एह तपाशी अभियान रंभेआ गेदा हा। अधिकारिएं मूजब सुरक्षाबलें दे अभियान दरान अजें कोई बी आतंकवादी मारेआ नेई गेआ ऐ। सुरक्षाबलें पूरे इलाके दी घेराबंदी कीती दी ऐ ते बउलै थमां गै इलाके गी खरी चाल्ली खंगालेआ जा करदा ऐ।

<><><><><><>

LG Interaction

उपराज्यपाल मनोज सिन्हा होरें बन्ने आले इलाके दे नोजवानें दी अदला बदली आले कार्यक्रम तैहत जम्मू कश्मीर दे 5एं दिनें दे दौरे पर आए दे नोजवानें कन्नै कल गल्लबात कीती। इस मोके पर उपराज्यपाल होरें नोजवानें दा आह्वान कीता जे ओह देशे दे समाजी-आर्थिक विकास च सक्रियता कन्नै अपनी भूमका नभान ते विकसित भारत दे नजरियै गी मूर्त रूप देने लेई अपने हिस्से दा योगदान देन। उपराज्यपाल होरें बन्ने आले ढांचे दे विकास ते बन्ने आले इलाके दे बसनीकें दे कल्याण लेई सरकार दी वचनबद्धता गी फही पक्का कीता।

<><><><><><>

JK Day Celebration

जम्मू कश्मीर दिवस दे उपलक्ष्य च कल नमीं दिल्ली दे न्यू मोतीबाग क्लब च इक शानदार विंटर कार्निवल कार्यक्रम दा आयोजन कीता गेआ। जम्मू कश्मीर दे रेजीडेंट कमीशन आस्सेआ आयोजित इस कार्यक्रम च 2024 ब४रे दे संभव उत्सव दिए चित्रकारिएं दी प्रदर्शनी लाई गई ते कश्मीरी ते डोगरी व्यंजनें दे कन्नै जश्न आले म्हौल दा नंद लैता गेआ। इस मौके पर वालवान थाली ते कैहवा खास तौर पर परोसेया गेआ। जम्मू कश्मीर दी कला, संस्कृति ते भाषाएं सरबन्धी अकैडमी आस्सेआ पेश कीते गेदे सांस्कृतिक ते लोक कला आले कार्यक्रमें उत्थें मजूद सब्बने दा मन परचाई लैता। इस समारोह दरान रिवायती प्शमीना शॉल, साड़ियां ते पेपरमाशी दियां कलाकृतियां बी प्रदर्शज कीतियां गेइयां जिनें बड़ी बद्ध गिनतरी च खरीददारें गी आकर्षित कीता।

<><><><><><>

VDG

भारती फौजै पुंछ जिले दे मेंढर सैक्टर दे इक अगेत्रे इलाके च ग्राम रक्षा गार्डें गी व्यापक सिखलाई दित्ती ऐ। कुल 43 ग्राम रक्षा गार्डें इस कार्यक्रमे च हिस्सा लैता जेहदा मकसद उनें गी गोली चलाना ते रक्षा सरबन्धी होर दुए बक्ख-बक्ख गुर सखाना हा। फौज दी राश्ट्रीय राईफल्स बटालियन दित्ती गेदी इस सिखलाई दरान ग्राम रक्षा गार्डें गी थेहारें दे रक्ख-रखाऽ सने आतंकवादी गुटें दे कम्म करने दे तरीकें बारै बी अहम जानकारी दित्ती गई।

<><><><><><>

Weather/Highway

मौसम विभाग नै 21 जनवरी गी प्रदेश दिएं टांमी टांमी थाहरें पर हौली बरखा बरने जां बर्फबारी दे असार दस्से न। मौसम विभाग मूजब 22 ते 23 जनवरी गी जम्मू संभाग दे पदरें इलाकें च हौली थमां दरम्याने दर्जे दी बरखा बरी सकदी ऐ ते केई उच्चे पहाड़ी इलाकें च बर्फबारी दी बी मेद ऐ। तोआई जम्मू-श्रीनगर राश्ट्री जरनैली शिड़क एनएच-44 पर गड्डिएं दी

आओजाई दौनें बक्खी दा बवस्था आहले ढंगै नै जारी ऐ। ऊआं लोकें गी एह सलाह दित्ती
गेई ऐ जे ओह अपनी-अपनी लेन च पूरे अनुशासन कन्नै गड्डी चलान ते दिनै दे बेल्ले गै
सफर करन। तोआई राजौरी ते पुंछ जिलें गी कश्मीर घाटी दे शोपियां जिले कन्नै जोड़ने
आहली ऐतिहासक मुगल रोड केई थाहरें पर भारी बर्फ किट्टी होने करी अजें बी गड्डिएं दी
आओजाई लेई बंद ऐ।

<><><><><><>